

ZAKON O ZAŠTITI OD POŽARA BRČKO DISTRIKTA BiH

(„Službene glasnik Brčko distrikta BiH“, br. 9/06 i 19/07 – Prečišćeni tekst)

DIO PRVI - OPĆE ODREDBE

Član 1.

(Pojam zaštite od požara)

Radi otkrivanja i sprečavanja opasnosti od požara i spašavanja ljudi i materijalnih i drugih dobara ugroženih požarom, organi Brčko distrikta BiH, preduzeća i druga pravna lica, preduzetnik, ovlašteno službeno lice i drugi organi, organizuju i obezbjeđuju zaštitu od požara, brinu se o njenom uspješnom funkcionisanju i učestvuju u njenom sprovođenju.

Član 2.

(Mjere i radnje zaštite od požara)

Zaštita od požara obuhvata skup mjera i radnji upravne, organizacione, tehničke, obrazovne i propagandne prirode, koje se preduzimaju radi sprečavanja nastajanja požara i njegovog širenja, otkrivanja nastalog požara i njegovog gašenja, te spašavanja ljudi i materijalnih dobara ugroženih požarom.

Član 3.

(Subjekti i objekti zaštite od požara)

(1) Zaštita od požara organizuje se i sprovodi u svim mjestima i na svim objektima koji su izloženi opasnostima od nastajanja i širenja požara.

(2) Vlasnici, odnosno korisnici objekata i prostora, te druga fizička lica, dužna su provoditi mjere zaštite od požara koje su propisane zakonom, planovima zaštite od požara i drugim propisima donesenim u skladu sa zakonom.

(3) Pravna i fizička lica te organi vlasti i uprave dužni su na način i pod uslovima utvrđenim zakonom, planom zaštite od požara i propisima donesenim u skladu sa zakonom, svojim alatom, prijevoznim, tehničkim i ostalim sredstvima te svojim radom učestvovati u gašenju požara i spašavanju ljudi i materijalnih dobara ugroženih požarom.

Član 4.

(Značaj zaštite od požara)

Zaštita od požara je djelatnost od posebnog interesa za Brčko distrikt BiH.

GLAVA – ORGANIZOVANJE ZAŠTITE OD POŽARA

Član 5.

(Nadležnosti Vlade Brčko distrikta BiH)

Vlada Brčko distrikta BiH nadležna je da:

- a) organizuje zaštitu od požara za područje Brčko distrikta BiH;
- b) brine o uspješnom provođenju i preduzimanju mjera za unapređenje zaštite od požara;
- c) na prijedlog odjeljenja nadležnog za poslove zaštite od požara i Inspektorata, donosi godišnji program aktivnosti provođenja posebnih mjera zaštite od požara od interesa za Brčko distrikt BiH.

Član 6.

(Aktivnosti Skupštine)

(1) Skupština Brčko distrikta BiH na prijedlog gradonačelnika, a koji odobri Vlada, Brčko distrikta BiH donosi plan zaštite od požara Brčko distrikta BiH.

(2) Planove zaštite od požara donose i preduzeća, druga pravna lica, organi uprave, u skladu sa ovim zakonom, odlukama i planom zaštite od požara Brčko distrikta BiH.

(3) Plan zaštite od požara u preduzećima i drugim pravnim licima donosi direktor - upravnik, a u organima funkcioner koji rukovodi tim organom.

Član 7.

(Planovi zaštite od požara)

(1) U planovima zaštite od požara utvrđuju se naročito:

Procjena ugroženosti od požara, organizacija zaštite od požara, način upotrebe vatrogasnih jedinica, sistem obavještanja, postupak u slučaju požara, tehnička oprema i sredstva za gašenje požara i spašavanje ljudi i materijalnih dobara, načini snabdijevanja vodom za gašenje požara, putevi, prilazi i prolazi, sadejstvo s drugim vatrogasnim jedinicama, kao i druge mjere potrebne za uspješno funkcionisanje i unapređivanje zaštite od požara i sprovođenja nadzora nad izvršavanjem mjera zaštite od požara.

(2) Metodologija za izradu plana zaštite od požara u skladu sa stavom 1 ovog člana utvrđuje se pravilnikom koji donosi šef odjeljenja nadležnog za poslove zaštite od požara uz prethodno dobijeno mišljenje inspektora za zaštitu od požara u Brčko distriktu BiH.

Član 8.

(Određivanje kategorija ugroženosti od požara)

(1) Radi utvrđivanja odgovarajuće organizacije i preduzimanja drugih mjera potrebnih za uspješno funkcionisanje i sprovođenje mjera zaštite od požara, preduzeća i druga pravna lica i organi, razvrstavaju se u četiri kategorije ugroženosti od požara, a u zavisnosti od

tehnološkog procesa, vrste materijala koji proizvode, prerađuju ili uskladištavaju, vrste materijala upotrijebljenog za izgradnju objekta i značaja objekta.

(2) Skupština Brčko distrikta BiH na prijedlog gradonačelnika, a koji odobri Vlada, Brčko distrikta BiH donosi propise o uslovima, osnovama i mjerilima za razvrstavanje preduzeća i drugih pravnih lica i organa u odgovarajuću kategoriju ugroženosti od požara.

(3) Vlada Brčko distrikta BiH shodno osnovama mjerilima i uslovima iz stava 2 ovog člana vrši razvrstavanje preduzeća i drugih pravnih lica i organa u odgovarajuću kategoriju ugroženosti od požara.

(4) Za obavljanje poslova iz prethodnog stava gradonačelnik Brčko distrikta BiH može angažovati stručno i ovlašteno preduzeće i drugo pravno lice.

(5) Izuzetno, Vlada Brčko distrikta BiH može, zbog privrednog, kulturnog, historijskog i drugog značaja, djelatnosti koje vrše preduzeća i druga pravna lica i organi, odrediti da one budu razvrstane u neposredno višu kategoriju ugroženosti od požara.

Član 9.

(Kategorije ugroženosti od požara)

(1) Preduzeća i druga pravna lica razvrstana u prvu kategoriju ugroženosti od požara dužna su da donesu plan zaštite od požara i da imaju industrijsku vatrogasnu jedinicu sa odgovarajućim brojem radnika na organizovanju i sprovođenju preventivnih mjera zaštite od požara.

(2) Preduzeća i druga pravna lica razvrstana u drugu kategoriju ugroženosti od požara dužna su da donesu plan zaštite od požara i da imaju odgovarajući broj radnika radi vršenja poslova stalnog dežurstva, neposrednog gašenja požara i sprovođenja preventivnih mjera zaštite od požara (u daljnjem tekstu: služba zaštite od požara).

(3) Preduzeća i druga pravna lica, preduzetnici razvrstani u treću kategoriju obavezni su da imaju najmanje jednog radnika koji neposredno organizuje i sprovodi preventivne mjere zaštite od požara (u daljnjem tekstu: referent za zaštitu od požara).

(4) Preduzeća i druga pravna lica, preduzetnici razvrstani u četvrtu kategoriju, obavezni su da imaju najmanje jednog radnika zaduženog za organizovanje i sprovođenje mjera zaštite od požara.

(5) Preduzeća i druga pravna lica i preduzetnici donose opći akt o zaštiti od požara a na osnovu stručnog mišljenja ovlaštene institucije.

(6) Gradonačelnik Brčko distrikta BiH donosi akt o razvrstavanju preduzeća i pravnih lica u odgovarajuće kategorije ugroženosti od požara po pribavljenom stručnom mišljenju ovlaštene institucije.

Član 10.

(Nadležnost za donošenje propisa)

Osim mjera zaštite od požara propisanih ovim zakonom Skupština Brčko distrikta BiH, može donijeti s obzirom na mjesne prilike i potrebe, propise i druge mjere kojima je cilj

sprečavanje izbijanja i širenja požara i spašavanje ljudi i materijalnih dobara ugroženih požarom.

GLAVA II – MJERE ZAŠTITE OD POŽARA

Član 11.

(Mjere zaštite od požara)

Mjere zaštite od požara u smislu ovog zakona su :

- a) Izbor lokacije (makro i mikro lokacije), dispozicije objekata, kao i izbor materijala, uređaja, instalacija i konstrukcija kojima će se spriječiti ili svesti na najmanju mjeru mogućnosti nastanka požara i tehnološke eksplozije i širenje požara;
- b) Izgradnja prilaznih puteva i prolaza;
- c) Obezbjedenje potrebnih količina vode i drugih sredstava za gašenje nastalog požara;
- d) Izbor i održavanje tehnoloških procesa rada i uređaja kojima se obezbeđuje sigurnost protiv nastanka požara;
- e) Zabrana upotrebe otvorene vatre i pojave drugih izvora paljenja u objektima i prostorijama u kojima bi moglo doći do nastanka požara;
- f) Način spašavanja ljudi i materijalnih dobara ugroženih požarom;
- g) Postavljanje uređaja za detekciju - otkrivanje i dojavu požara, uređaja i opreme za gašenje požara, uređaja i opreme za sprečavanje širenja požara, uređaja za mjerenje koncentracije eksplozivnih smjesa (smjese vazduha sa zapaljivim gasovima, parama zapaljivih tečnosti i zapaljivim prašinama), i drugih uređaja za kontrolu sigurnog odvijanja tehnološkog procesa;
- h) Redovno održavanje i kontrola uređaja i instalacija čija neispravnost može uticati na nastanak i širenje požara;
- i) Organizovanje osmatračke službe u šumskim gazdinstvima i većim poljoprivrednim dobrima neposredno prije i u vrijeme žetve, i obezbeđenje opreme i sredstava za gašenje.

Član 12.

(Planovi)

(1) Prostornim, urbanističkim ili regulacionim planom, urbanističkim redom ili urbanističkim projektom u odnosu na mjere zaštite od požara utvrđuju se naročito:

- a) Sistem objekata vodosnabdijevanja, razvoj primarne i sekundarne mreže sa odgovarajućim kapacitetima za potrebe zaštite od požara;
- b) Udaljenost između zona predviđenih za industrijske objekte, skladišta zapaljivih tečnosti, zapaljivih gasova i eksplozivnih materija;

c) Udaljenost između objekata različite namjene unutar industrijske zone;

d) Širina puteva koji omogućavaju pristup vatrogasnim vozilima do svakog objekta i njihovo manevrisanje za vrijeme gašenja požara.

(2) Za prostorne, urbanističke i regulacione planove, urbanistički red ili urbanistički projekat prije donošenja, potrebno je pribaviti mišljenje Odjeljenja nadležnog za poslove zaštite od požara u pogledu primijenjenih mjera zaštite od požara.

Član 13.

(Mjere zaštite od požara na građevinskim objektima)

(1) Građevinski objekti grade se na mjestu i na način da se time ne stvara opasnost od požara za druge objekte.

(2) Na postojećim objektima ne mogu se izvoditi radovi koji bi mogli dovesti do smanjenja bezbjednosti od požara na samom objektu ili na susjednim objektima.

(3) Izvođač radova na objektima iz stava jedan ovog člana dužan je u pisanoj formi odrediti i preduzeti potrebne mjere za sprečavanje nastajanja požara, onemogućiti širenje požara i obezbijediti potrebna sredstva i opremu za gašenje požara.

(4) U slučaju potrebe izvođenja radova na objektima i prostorima koji se nalaze u zonama ugroženim od požara i eksplozije, radovi se ne smiju započeti bez prethodno pribavljenog odobrenja od referenta za zaštitu od požara ili odgovornog lica za zaštitu od požara.

Član 14.

(Požarni sektori)

(1) U tehničkoj dokumentaciji za stambene objekte s četiri i više nadzemnih etaža, objektima namijenjenim za javnu upotrebu u kojima se okuplja ili istovremeno boravi ili radi veći broj lica (bolnice i druge zdravstvene ustanove, hoteli i drugi ugostiteljski objekti, sportske i druge dvorane, škole, obdaništa, robne kuće i drugi trgovački objekti, saobraćajne stanice i drugi slični objekti) i industrijskim objektima određuju se požarni sektori.

(2) Požarni sektori u smislu ovog zakona predstavljaju određeni prostor koji onemogućava širenje požara.

Član 15.

(Određivanje požarnih sektora)

(1) Iz požarnih sektora objekata iz stava 1 čl. 14 mora biti omogućena sigurna evakuacija u slučaju nastanka požara, a putevi evakuacije moraju imati dovoljnu propusnost, najkraći smjer i biti na siguran način zaštićeni od vatre i dima.

(2) Požarni sektori određuju se na osnovu standarda i analiza požarnog opterećenja, požarne opasnosti (rizika), načina širenja požara i materijalne vrijednosti objekta ili dijela objekta.

Član 16.

(Saglasnost na mjere i normative zaštite)

(1) Odobrenje za građenje objekta neće se izdati ako se ne pribavi saglasnost od odjeljenja nadležnog za poslove sigurnosti na mjere i normative zaštite od požara predviđene u tehničkoj dokumentaciji.

(2) U određenim slučajevima kada se radi o objektima od posebnog značaja (industrijski objekti, javni objekti u kojima se okuplja ili boravi veći broj ljudi, i dr.) i kada ocijeni da je to potrebno nadležno odjeljenje za poslove sigurnosti, može uputiti da stručnu ocjenu na primjeni mjera, normativa, standarda i drugih propisa iz oblasti zaštite od požara predviđenih u tehničkoj dokumentaciji da stručno i ovlašteno poduzeće i drugo pravno lice.

(3) Saglasnost je potrebna za sve objekte izuzev za individualnu stambenu izgradnju, objekte koji se koriste za povremeni boravak i odmor u individualnoj izgradnji i za otvorene sportske terene i dječija igrališta.

Član 17.

(Izrada tehničke dokumentacije)

(1) Preduzeća i druga pravna lica, preduzetnik ili ovlašteno stručno lice koji rade tehničku dokumentaciju za građenje objekta dužni su:

a) Pri izradi tehničke dokumentacije ugraditi sve propisane mjere zaštite od požara u skladu s tehnološkim projektnim zadatkom;

b) Uz tehničku dokumentaciju izraditi prilog zaštite od požara s naznakom svih opasnosti koje se mogu pojaviti pri korištenju objekta i mjere koje su predviđene u tehničkoj dokumentaciji, kako bi se ove opasnosti otklonile.

1) Prilog zaštite od požara je sastavni dio tehničke dokumentacije koji na sažet i cjelovit način a na osnovu grafičkih priloga, proračuna i tekstualnih objašnjenja prikazuje sve opasnosti za nastajanje požara te mjere zaštite od požara za svaku opasnost posebno, kao i proračun i shematski prikaz potrebne opreme i sredstava za gašenje početnih požara i uređaja za dojavu požara.

2) Navesti sve propise koji su korišteni pri izradi tehničke dokumentacije.

(2) Prilog iz stava 1 tačke b ovog člana izrađuje se za svaki objekat ili dio objekta ili instalacije koji su predmet projektovanja i sadrži izjavu s potpisom odgovornog projektanta.

(3) Projektant iz prethodnog stava dužan je uz projekat dati ispravu kojom dokazuje da je projektovanje objekta, odnosno tehničko-tehnološkog procesa izvršeno u skladu sa zakonom i propisima donesenim na osnovu zakona.

(4) Ako u izradi tehničke dokumentacije učestvuje više preduzeća i drugih pravnih lica, investitor je obavezan da obezbijedi jedinstvenu ispravu od projektanta ili organizacije iz člana 19 ovog zakona, na osnovu isprava pojedinih projektanata.

Član 18.

(Primjena mjera i normativa zaštite pri izradi tehničke dokumentacije)

- (1) Preduzeća i druga pravna lica, preduzetnik i ovlašteno stručno lice koji radi tehničku dokumentaciju, investitor i izvođači građevina i građevinskih cjelina, dužni su da u izradi tehničke dokumentacije i građenju primjenjuju propisane mjere i normative zaštite od požara.
- (2) Za građevinski materijal, elemente, opremu i druge materijale koji se ugrađuju u objekat, a koji su od posebnog značaja za sprečavanje nastanka ili širenja požara u tom objektu, moraju se obezbijediti dokazi o njihovoj vatrootpornosti i požarnim karakteristikama.
- (3) Za finalnu obradu vodoravnih i vertikalnih požarnih izlaza i izlaznih puteva u objektu, smiju se ugrađivati samo materijali određenih požarnih karakteristika.
- (4) Za ugrađeni materijale iz stava 2 ovog člana izvođač radova je dužan pribaviti dokaze o njihovoj vatrootpornosti i požarnim karakteristikama i dati ih na uvid prilikom tehničkog prijema objekta.

Član 19.

(Davanje stručne ocjene o primjeni mjera zaštite od požara)

- (1) Preduzeća i druga pravna lica ovlaštena od nadležnih organa Brčko distrikta BiH i nadležnih entitetskih organa, a koja ispunjavaju uslove, mogu davati stručne ocjene o primjeni mjera zaštite od požara na osnovu propisa, standarda i drugih normativa predviđenih u tehničkoj dokumentaciji, na području Brčko distrikta BiH.
- (2) Uslovi i postupak za dobivanje ovlaštenja iz prethodnog stava za područje Brčko distrikta BiH propisat će se posebnim pravilnikom koji će donijeti Vlada Brčko distrikta BiH.
- (3) Šef odjeljenja za davanje stručne o primjeni mjera zaštite od požara može zabraniti preduzećima i drugim pravnim licima iz stava 1 ovog zakona rad na području Brčko distrikta BiH ukoliko se utvrdi da se ona ne pridržavaju propisa, standarda i drugih normativa zaštite od požara.

Član 20.

(Ispitivanje opreme za sprečavanje požara)

- (1) Odobrenje za upotrebu objekta u kojem je ugrađen sistem za dojavu i gašenje požara, uređaji za kontrolno i zaštitno djelovanje i uređaji za sprečavanje širenja požara može se izdati nakon što se ispita njihova ispravnost i optimalno djelovanje u skladu s projektnim rješenjem i primijenjenim standardima i normativima.
- (2) Ispitivanje iz prethodnog stava kao i periodično ispitivanje, prema tehničkim propisima i uputstvima proizvođača, mogu vršiti samo preduzeća i druga pravna lica koja su registrovana za tu djelatnost, a imaju odgovarajuću opremu i čiji su radnici stručno osposobljeni za obavljanje tih poslova.
- (3) Preduzeća i pravna lica iz prethodnog stava mogu obavljati poslove tek onda kada za to dobiju odobrenje od nadležnih organa Brčko distrikta BiH ili imaju odobrenje nadležnih entitetskih organa.

Član 21.

(Uslovi za postavljanje instalacija)

(1) Električne, ventilacione, gasne, naftovodne, toplovodne, gromobranske i druge instalacije i uređaji kao i dimovodi moraju se postaviti odnosno izvoditi, koristiti i održavati prema propisanim tehničkim normativima i obaveznim standardima kao i uputstvima proizvođača o čemu mora postojati dokumentacija.

(2) Instalacije i uređaji iz prethodnog stava kao i dimovodi i ložišta mogu se upotrebljavati samo ako su ispravni i ako su pravilno postavljeni.

Član 22.

(Zaštita od otvorene vatre)

(1) Prilikom paljenja korova, strništa, raznog otpada, upotrebe roštilja i slično gdje se koristi otvorena vatra i užarena tijela korisnici su dužni preduzeti sve mjere da se spriječi eventualno širenje vatre koja može prouzrokovati požar.

(2) Vruć pepeo i šljaka iz ložišnih uređaja ne smije se odlagati u posude i mjesta određena za odlaganje otpada.

Član 23.

(Zapaljive materije i otvorena vatra)

(1) Zapaljive materije mogu se držati i uskladištavati samo u objektima koji su za to podešeni ili preuređeni u skladu s tehničkim i drugim propisima.

(2) Otvorena vatra (otvorena ložišta, otvoreni plamen i sl.) koji se koristi u tehnološkim procesima ili u postupku rada u samostalnim radnjama može se upotrebljavati samo u skladu s tehničkim propisima.

Član 24.

(Vodovodna mreža)

Pri izgradnji ili rekonstrukciji vodovodne mreže u naseljenim mjestima mora se obezbijediti protok, kapacitet, pritisak u hidrantskoj mreži u skladu s propisima a koji su potrebni za efikasno gašenje požara .

Član 25.

(Ispravnost uređaja, alata i opreme za gašenje požara)

Preduzeća i druga pravna lica i preduzetnici dužni su da drže u pripravnosti ispravne uređaje, alat i opremu za gašenje požara na mjestima koja su lahko pristupačna (podest, hodnik, trijem i sl.).

Član 26.

(Zaštita usjeva)

(1) Preduzeća i druga pravna lica i preduzetnici u oblasti poljoprivrede i poljoprivredni proizvođači, za vrijeme sazrijevanja žitarica, žetve i vršidbe, dužni su preduzeti posebne mjere zaštite strnih usjeva od požara.

(2) Pod posebnim mjerama zaštite strnih usjeva od požara podrazumijevaju se organizovanje stalnog dežurstva, osmatranje, obavještanje i kontrola nad sprovođenjem tih i drugih mjera zaštite od požara.

(3) Propise o posebnim mjerama zaštite od požara u poljoprivredi donosi nadležno Odjeljenje za poljoprivredne poslove.

Član 27.

(Vatrogasno dežurstvo u objektima)

(1) U objektima u kojima se održavaju javni skupovi, priredbe, sajmovi i slično organizatori su dužni da za vrijeme njihovog trajanja obezbijede dodatne mjere zaštite od požara a po potrebi vatrogasno dežurstvo.

(2) U preduzećima i drugim pravnim licima vatrogasno dežurstvo se organizuje i u toku procesa rada i drugih poslova kada je povećana opasnost za nastajanje požara.

(3) Pod vatrogasnim dežurstvima iz stavova 1 i 2 ovog člana podrazumijeva se prisustvo jednog ili više lica stručno osposobljenih za gašenje požara sa odgovarajućom opremom i sredstvima za blagovremeno gašenje početnih požara.

Član 28.

(Uvoz opreme za zaštitu od požara)

Uvoznik odnosno zastupnik strane firme dužan je prije stavljanja u promet uređaja, opreme i sredstava za zaštitu od požara i eksplozija, da pribavi atest registrovane ili ovlaštene organizacije u smislu Zakona o standardizaciji, a za opremu koja se koristi u tehnološkim i drugim procesima sa lahko zapaljivim ili eksplozivnim materijama, da izda dokaz po izvršenom ispitivanju njihove usklađenosti s propisima i standardima o zaštiti od požara i eksplozija ili o tome pribavi mišljenje ovlaštenog preduzeća i drugog pravnog lica iz člana 19 ovog zakona.

Član 29.

(Ručni i prijevozni aparati za gašenje požara)

(1) Korisnici ručnih i prijevoznih aparata za gašenje početnog požara te hidrantske mreže dužni su da obezbijede redovnu kontrolu ispravnosti i ispitivanje prema uputstvu proizvođača, odnosno prema utvrđenim standardima.

(2) Kontrola ispravnosti i ispitivanje aparata iz prethodnog stava koji se nalaze u prometu kao i u upotrebi može vršiti preduzeće i drugo pravno lice i samostalni privrednik, koji su registrovani za tu djelatnost i imaju odgovarajuću tehničku opremu, poslovni prostor i stručne radnike i koji za to dobiju odobrenje od nadležnih organa Brčko distrikta BiH ili imaju odobrenje od nadležnih entitetskih organa.

(3) Pravilnik o ispunjavanju uslova za vršenje kontrole ispravnosti i ispitivanja vatrogasnih aparata za gašenje početnih požara donosi Vlada Brčko distrikta BiH, a na prijedlog nadležnog odjeljenja za poslove zaštite od požara.

(4) Kontrola ispravnosti vatrogasnih aparata za gašenje početnih požara te kontrola ispravnosti i mjerenje pritiska hidrantske mreže te opremljenosti i kompletiranosti hidrantskih ormara vrši se svakih 6 mjeseci.

(5) O izvršenoj kontroli ispravnosti i ispitivanjima vodi se evidencija koja sadrži vrstu i identifikacioni broj aparata, vrstu i lokaciju hidranata, ime radnika koji vrši kontrolu i ispitivanje, datum kontrole i ispitivanja.

Član 30.

(Obavezni rok za ispitivanje ispravnosti uređaja za gašenje požara)

(1) Korisnik objekta u kojem je ugrađen sistem za dojavu i gašenje požara, uređaji za kontrolu i zaštitno djelovanje, uređaji za sprečavanje širenja požara dužan je obezbijediti njihovu ispravnost, funkcionalnost kao i njihovo redovno ispitivanje prema tehničkim propisima i uputstvu proizvođača, a najmanje jednom u roku od 6 mjeseci, o čemu mora voditi evidenciju.

(2) Ispitivanje iz stava 1 ovog člana može vršiti ovlašteno preduzeće ili drugo pravno lice.

Član 31.

(Opći akt o zaštiti od požara i ovlašteno lice)

(1) Preduzeća i druga pravna lica i preduzetnici dužni su općim aktom zaštite od požara utvrditi mjere i radnje u vezi sa sprovođenjem i unapređivanjem zaštite od požara i odrediti radnika koji je kao odgovorno lice dužan da se stara o sprovođenju mjera zaštite od požara i obezbijediti da taj radnik bude posebno stručno osposobljen za uspješno vršenje poslova zaštite od požara.

(2) Izuzetno, može se povjeriti sprovođenje mjera zaštite od požara preduzeću ili drugom pravnom licu ili samostalnom privredniku koji su registrovani za tu djelatnost.

(3) Odgovorno lice iz stava 1 ovog člana mora imati najmanje IV stepen stručne spreme.

(4) Preduzeća i druga pravna lica, organi i organizacije iz stava 1 ovog člana, polazeći od svojih uslova rada i privređivanja, a u skladu s propisima o zaštiti od požara, utvrdit će općim aktom naročito:

a) opasnosti za nastanak požara;

b) radna uputstva koja moraju sadržavati mjere zaštite od požara za sve tehnološke i druge jedinice gdje postoji opasnost za nastanak požara uz bližu razradu obaveza prema radnom uputstvu i drugim propisima svakog pojedinog radnika u pogledu kontrole i sprovođenja mjera i propisa iz oblasti zaštite od požara;

c) organizaciju, djelokrug i ovlaštenje službe za zaštitu od požara odnosno odgovornog radnika za zaštitu od požara u zavisnosti od izvršene kategorizacije preduzeća u skladu s članom 9 ovog zakona;

- d) način vršenja unutrašnje kontrole sprovođenja zaštite od požara te dužnosti, odgovornosti i ovlaštenja radnika koji tu kontrolu neposredno vrši;
- e) stručnu spremu rukovodioca službe i drugih radnika koji obavljaju poslove zaštite od požara;
- f) postupak i način upoznavanja radnika prilikom stupanja na rad ili raspoređivanja na drugo radno mjesto s tehnološkim procesom rada i opasnostima od požara vezanim za to radno mjesto, kao i način obučavanja radnika o upotrebi sredstava i opreme za gašenje požara;
- g) prostorije, prostore i mjesta na kojima se ne smije koristiti ili prenositi otvorena vatra, pušiti i upotrebljavati alat koji varniči;
- h) vrstu i količinu opreme i sredstava za gašenje požara, raspored opreme i sredstava kao i vrijeme povremenog ispitivanja njihove ispravnosti;
- i) zadatke i odgovornost rukovodećih radnika u vezi sa sprovođenjem zaštite od požara;
- j) dužnosti i ponašanja radnika u slučaju izbijanja požara i način spašavanja ljudi i materijalnih dobara,
- k) odgovornost radnika zbog nepridržavanja propisanih mjera zaštite od požara;
- l) način saradnje službe zaštite od požara i odgovornih radnika za zaštitu od požara sa ostalim službama koje rade na unapređivanju zaštite od požara, tehničkom službom zaštite na radu, civilnom zaštitom i ovlaštenim inspektorom zaštite od požara.

(5) Gradonačelnik na prijedlog nadležnog odjeljenja za poslove zaštite od požara donosi pravilnik o programu i načinu polaganja stručnog ispita za radnike koji obavljaju poslove zaštite od požara u preduzećima.

Član 32.

(Obaveza dostave općeg akta o zaštiti od požara)

Preduzeća i druga pravna lica, preduzetnici dužni su nadležnom odjeljenju za poslove zaštite od požara dostaviti opći akt o zaštiti od požara.

Član 33.

(Obuka o opasnostima od požara)

(1) Preduzeća i druga pravna lica, preduzetnici dužni su da obezbijede da svaki radnik, prema posebno utvrđenom programu bude upoznat sa opasnostima od požara za poslove i zadatke na kojima je raspoređen, kao i s mjerama i sredstvima za gašenje požara, praktičnom upotrebom priručnih sredstava, vatrogasnih aparata za gašenje početnih požara i ostalih uređaja i opreme za gašenje požara kao i s materijalnom i drugom odgovornošću zbog nepridržavanja propisanih mjera i propisa zaštite od požara.

(2) Preduzeća i druga pravna lica dužni su da najmanje jednom godišnje organizuju obuku i vrše provjeru znanju radnika iz prethodnog stava, o čemu mora postojati odgovarajuća dokumentacija.

Član 34.

(Odgovornost za primjenu mjera zaštite od požara)

(1) Direktor preduzeća ili drugog pravnog lica, funkcioner koji rukovodi organom, rukovodeći radnici i radnici s posebnim ovlaštenjima u preduzeću i pravnom licu, preduzetnici, vlasnici preduzeća i samostalnih radnji, svaki u svom djelokrugu odgovorni su za organizovanje i sprovođenje zaštite od požara, naročito za primjenu propisanih i naloženih mjera, održavanje u ispravnom stanju i namjensku upotrebu opreme i sredstava za gašenje požara kao i za upoznavanje radnika sa opasnostima od požara vezano za njihove poslove i radne zadatke.

(2) Za sprovođenje propisanih i naloženih mjera zaštite od požara u stambenim objektima odgovoran je vlasnik objekta, a za stambene i stambeno poslovne objekte odgovorni su etažni vlasnici.

Član 35.

(Obaveze osiguravajućih društava)

Osiguravajuća društva koja posluju na teritoriji Brčko distrikta BiH dužna su da o svim saznanjima očigledne povrede zakona i drugih propisa iz zaštite od požara, prilikom utvrđivanja rizika i procjene štete nastale od požara bez odlaganja obavijestiti nadležno odjeljenje za poslove zaštite od požara.

GLAVA III – VATROGASNE JEDINICE

Član 36.

(Osnivanje vatrogasnih jedinica)

(1) Radi učestvovanja u sprovođenju preventivnih mjera zaštite od požara, gašenja požara i spašavanja ljudi i materijalnih dobara ugroženih požarom, spašavanje ljudi i materijalnih dobara ugroženih elementarnim nepogodama i akcidentnim situacijama, spašavanja povrijeđenih u saobraćajnim nesrećama kao i vršenja drugih zadataka u vezi sa zaštitom od požara utvrđenih planom zaštite od požara Brčko distrikta BiH, osnivaju se vatrogasne jedinice.

(2) Vatrogasne jedinice mogu biti profesionalne vatrogasne jedinice, dobrovoljne vatrogasne jedinice i industrijske vatrogasne jedinice. Profesionalne vatrogasne jedinice osnivaju se u skladu sa ovim zakonom za područje Brčko distrikta BiH, ili za dio teritorije Brčko distrikta BiH (u daljnjem tekstu: teritorijalne vatrogasne jedinice).

(3) Preduzeća i druga pravna lica u skladu s članom 9 ovog zakona osnivaju industrijske vatrogasne jedinice.

(4) Dobrovoljne vatrogasne jedinice formiraju se u vatrogasnim društvima a u zavisnosti od vatrogasnog društva mogu biti formirane na teritorijalnom ili preduzetnom principu.

(5) Teritorijalne vatrogasne jedinice ostvaruju i zadatke jedinica civilne zaštite u skladu sa Zakonom o civilnoj zaštiti.

Član 37.

(Osnivanje profesionalne vatrogasne jedinice)

(1) Profesionalna teritorijalna vatrogasna jedinica osniva se odlukom Skupštine Brčko distrikta BiH kao posebna organizacija.

(2) Odlukom iz prethodnog stava određuje se djelokrug poslova i nadležnost vatrogasne jedinice.

Član 38.

(Rukovođenje profesionalnom vatrogasnom jedinicom)

(1) Profesionalnom teritorijalnom vatrogasnom jedinicom rukovodi starješina teritorijalne vatrogasne jedinice, koga imenuje gradonačelnik Brčko distrikta BiH.

(2) Na prijedlog šefa odjeljenja nadležnog za poslove zaštite od požara gradonačelnik Brčko distrikta BiH odlučuje i daje saglasnost na akt o unutrašnjoj organizaciji i sistematizaciji radnih mjesta u profesionalnoj teritorijalnoj vatrogasnoj jedinici, a u skladu s planom zaštite od požara Brčko distrikta BiH.

Član 39.

(Starješina profesionalne vatrogasne jedinice)

(1) Za starješinu profesionalne vatrogasne jedinice može se imenovati lice koje ima najmanje školsku spremu VI stepena složenosti, smjer zaštite od požara ili drug smjer.

(2) Starješina profesionalne vatrogasne jedinice može imati zamjenika, koji ima najmanje završenu spremu VI stepena, smjer zaštita od požara ili drugi smjer.

Član 40.

(Nadzor)

Nadležno odjeljenje za poslove zaštite od požara u Brčko distriktu BiH vrši nadzor nad radnom vatrogasnih jedinica, naročito u pogledu spremnosti i tehničke opremljenosti jedinica i stručnog osposobljavanja i usavršavanja vatrogasaca kao i sposobnosti vatrogasne jedinice za gašenje požara.

Član 41.

(Saradnja vatrogasnih jedinica)

(1) U gašenju požara i spašavanju ljudi i materijalnih dobara ugroženih požarom i spašavanju ljudi i materijalnih dobara ugroženih elementarnim nepogodama i akcidentnim situacijama kao i većim saobraćajnim nesrećama vatrogasne jedinice dužne su međusobno sarađivati i jedne drugima pružati pomoć.

(2) Na traženje pomoći vatrogasne jedinice van Brčko distrikta BiH, Profesionalna vatrogasna jedinica Brčko je dužna se odazvati, uz prethodno pribavljenu saglasnost šefa odjeljenja za javnu sigurnost ili lica koje gradonačelnik pismenom odlukom ovlasti.

(3) Prije upućivanja djela jedinice na pružanje pomoći van teritorije Brčko distrikta BiH mora se obezbijediti dovoljan broj ljudi i materijalno-tehničkih sredstava za pokrivanje teritorije Brčko distrikta BiH.

Član 42.

(Stručno osposobljavanje i usavršavanje)

(1) Profesionalne vatrogasne jedinice i industrijske vatrogasne jedinice, za svaku kalendarsku godinu, donose plan i program stručnog osposobljavanja i usavršavanja profesionalnih vatrogasaca i industrijskih vatrogasaca koji mora biti usmjeren na osposobljavanje profesionalnih vatrogasaca i njihovu spremnost za brzo i efikasno djelovanje u izvršavanju zadataka vatrogasne jedinice.

(2) Nadležno odjeljenje za poslove zaštite od požara daje saglasnost na plan i program iz prethodnog stava i vrši nadzor nad njihovim izvršavanjem.

(3) Vatrogasne jedinice iz stava 1 ovog člana po završetku kalendarske godine organizuju provjeru stručnog znanja vatrogasaca.

(4) Profesionalni vatrogasac koji prilikom provjeravanja stručnog znanja iz prethodnog stava ne pokaže zadovoljavajući uspjeh, ne može nastaviti rad na poslovima i zadacima na kojima je raspoređen.

(5) Odredbe prethodnih stavova odnose se i na dobrovoljne vatrogasne jedinice.

Član 43.

(Evidencije i obavještavanje)

(1) Vatrogasne jedinice dužne su da vode propisanu evidenciju o požarima i elementarnim nepogodama i o svome učestvovanju u gašenju požara i spašavanju ljudi i materijalnih dobara.

(2) Profesionalna vatrogasna jedinica i dobrovoljne vatrogasne jedinice osnovane na teritorijalnom principu, dužne su da Skupštini Brčko distrikta BiH, na njen zahtjev, dostavljaju stalne i povremene izvještaje i daju pojedine podatke kojim raspolažu u vezi s poslovima zaštite od požara.

(3) Vatrogasne jedinice su dužne odmah nakon izvršene dojavae o nastalom požaru obavijestiti policiju Brčko distrikta BiH.

(4) Vatrogasne jedinice su dužne po završetku tekućeg mjeseca dostaviti pismene izvještaje o intervencijama gašenja požara nadležnom Odjeljenju za poslove zaštite od požara.

Član 44.

(Uniforma i zaštitna oprema vatrogasaca)

Za vrijeme vršenja dužnosti vatrogasci su dužni da nose propisanu uniformu, a u toku intervencije gašenja požara i spašavanja ljudi i materijalnih dobara, dužni su da nose i propisanu zaštitnu opremu.

Član 45.

(Sastav vatrogasnih jedinica)

- (1) Profesionalne i dobrovoljne vatrogasne jedinice iz člana 36 ovog zakona ne mogu imati manje od 12 vatrogasaca.
- (2) Kod utvrđivanja broja vatrogasaca u svim vatrogasnim jedinicama mora se voditi računa o sposobnosti i spremnosti vatrogasne jedinice iz prethodnog stava, tako da svaka smjena koja je na dužnosti bude po svom brojnom sastavu, stručnoj osposobljenosti i tehničkoj opremljenosti sposobna za efikasno gašenje požara .
- (3) U vrijeme obavljanja svojih poslova i zadataka vatrogasac ne smije biti pod uticajem alkohola, opojnih droga ili psihotropnih supstanci.
- (4) Tehnička oprema i sredstva za gašenje požara moraju biti ispravna i u pripravnosti i održavati se prema uputstvu proizvođača o čemu se vodi propisana dokumentacija.

Član 46.

(Pripadnik profesionalne vatrogasne jedinice)

- (1) Za vatrogasca u profesionalnoj vatrogasnoj jedinici može se primiti lice koje pored općih uslova za sticanje svojstva radnika ispunjava i slijedeće uslove:
 - a) da ima najmanje spremu IV ili III stepena obrazovanja odgovarajuće vatrogasne struke i drugih;
 - b) da nije starije od 25 godina;
 - c) da je zdravstveno i psihofizički sposobno za obavljanje poslova profesionalnog vatrogasca.
- (2) Zdravstvene i psihofizičke uslove iz tačke 3 prethodnog stava propisuje nadležni organ za poslove zdravstva u Brčko distriktu BiH.
- (3) Lica iz stava 1 ovog člana mogu učestvovati u gašenju požara ako su položila propisani stručni ispit za profesionalnog vatrogasca.
- (4) Uslove iz stava 1 tački a, b i c ovog člana moraju ispunjavati lica koja se prvi put primaju na rad kao profesionalni vatrogasci.
- (5) Općim aktom teritorijalne vatrogasne jedinice mogu se propisati i drugi posebni uslovi za obavljanje poslova i zadataka profesionalnog vatrogasca.

Član 47.

(Stručni ispit – obaveza polaganja)

- (1) Stručni ispit za rukovodioca akcije gašenja požara dužni su položiti starješine profesionalnih vatrogasnih jedinica, njihovi zamjenici, radnici profesionalnih vatrogasnih jedinica koji rukovode jedinicom u intervenciji gašenja požara i spašavanja ljudi i materijalnih

dobara, kao i rukovodioci dobrovoljnih i industrijskih vatrogasnih jedinica koji poslove obavljaju profesionalno.

(2) Izuzetno od odredbi prethodnog stava rukovodioci i članovi (vatrogasci) dobrovoljnih vatrogasnih jedinica koji te dužnosti ne obavljaju profesionalno, moraju imati položen ispit za rukovodioca akcije gašenja požara, odnosno za zvanje vatrogasca u dobrovoljnom vatrogastvu po pravilima Vatrogasnog saveza.

Član 48.

(Stručni ispit)

(1) Stručni ispit za profesionalnog vatrogasca i za rukovodioca akcije gašenja požara u profesionalnom vatrogastvu polaže se pred ispitnom komisijom koju imenuje Vlada Brčko distrikta BiH, na zahtjev nadležnog odjeljenja za poslove zaštite od požara.

(2) Troškove polaganja stručnog ispita snosi vatrogasna jedinica koja je uputila kandidata na polaganje.

(3) Visinu troškova za polaganje stručnog ispita i visinu naknade članova ispitne komisije određuje Vlada Brčko distrikta BiH na prijedlog nadležnog odjeljenja za poslove zaštite od požara.

(4) Način pripremanja, uslovi polaganja stručnog ispita, nastavni plan i program stručnog osposobljavanja za polaganje ispita za profesionalnog vatrogasca i rukovodioca akcije gašenja požara u profesionalnom vatrogastvu i ostalo vezano za obrazovanje kadrova u profesionalnom vatrogastvu definisat će se pravilnikom o stručnom osposobljavanju i polaganju stručnog ispita za profesionalnog vatrogasca i rukovodioca akcije gašenja požara u profesionalnom i industrijskom vatrogastvu, a koji donosi Vlada Brčko distrikta BiH.

Član 49.

(Rad u smjenama)

(1) U profesionalnim vatrogasnim jedinicama i u dobrovoljnim vatrogasnim jedinicama u kojima se poslovi obavljaju profesionalno rad se odvija u smjenama, neprekidno u toku 24 sata, s tim što rad u jednoj smjeni ne može trajati duže od 12 sati.

(2) Rad jedne smjene može se produžiti samo ako je to neophodno za gašenje požara i spašavanje ljudi i materijalnih dobara, kao i za vršenje neodložnih poslova čije bi prekidanje prouzrokovalo posljedice opasne po život ili prouzrokovalo veće materijalne štete.

GLAVA IV - INDUSTRIJSKA VATROGASNA JEDINICA

Član 50.

(Pojam)

(1) Radi učestvovanja u sprovođenju preventivnih mjera zaštite od požara, gašenja požara i spašavanja ljudi i materijalnih dobara ugroženih požarom, spašavanje ljudi i materijalnih dobara ugroženih elementarnim nepogodama i akcidentnim situacijama, kao i vršenja drugih zadataka u vezi sa zaštitom od požara utvrđenih planom zaštite od požara, preduzeća i druga pravna lica od svojih zaposlenika osnivaju industrijske vatrogasne jedinice.

(2) Industrijske vatrogasne jedinice osnivaju se u skladu sa ovim zakonom i planom zaštite od požara Brčko distrikta BiH.

Član 51.

(Poslovi i nadležnost)

(1) Odlukom o osnivanju industrijske vatrogasne jedinice, koju donosi nadležni organ preduzeća ili drugog pravnog lica, određuje se djelokrug poslova i nadležnost industrijske vatrogasne jedinice.

(2) Vlada Brčko distrikta BiH daje saglasnost na odluku o osnivanju industrijske vatrogasne jedinice.

Član 52.

(Zajednička vatrogasna jedinica)

(1) Dva ili više preduzeća ili drugih pravnih lica može sporazumno osnovati zajedničku industrijsku vatrogasnu jedinicu ako to teritorijalni položaj preduzeća dozvoljava.

(2) Vlada Brčko distrikta BiH daje saglasnost na sporazum o osnivanju zajedničke vatrogasne jedinice.

Član 53.

(Starješina)

(1) Industrijskom vatrogasnom jedinicom rukovodi starješina industrijske vatrogasne jedinice, koga imenuje uprava preduzeća.

(2) Starješina industrijske vatrogasne jedinice mora biti na tom radnom mjestu raspoređen na neodređeno radno vrijeme s punim radnim vremenom.

Član 54.

(Uslovi imenovanja)

Za starješinu industrijske vatrogasne jedinice može se imenovati zaposlenik koji ima najmanje školsku spremu V stepena složenosti.

Član 55.

(Nadzor)

Nadležno odjeljenje za poslove zaštite od požara u Brčko distriktu BiH vrši nadzor nad radom industrijske vatrogasne jedinice, naročito u pogledu spremnosti i tehničke opremljenosti jedinica i stručnog osposobljavanja i usavršavanja vatrogasaca kao i sposobnosti vatrogasne jedinice za gašenje požara.

Član 56.

(Saradnja)

(1) U gašenju požara i spašavanju ljudi i materijalnih dobara ugroženih požarom i spašavanju ljudi i materijalnih dobara ugroženih elementarnim nepogodama i akcidentnim situacijama, industrijske vatrogasne jedinice dužne su sarađivati i pružati pomoć ostalim vatrogasnim jedinicama na području Brčko distrikta BiH.

(2) Prije upućivanja dijela jedinice na pružanje pomoći van preduzeća ili drugog pravnog lica, mora se obezbijediti dovoljan broj ljudi i materijalno-tehničkih sredstava za pokrivanje preduzeća ili drugog pravnog lica.

Član 57.

(Stručno osposobljavanje)

(1) Industrijske vatrogasne jedinice, za svaku kalendarsku godinu, a najkasnije do 31. januara tekuće godine, donose plan i program stručnog osposobljavanja i usavršavanja svojih zaposlenika za obavljanje poslova industrijskih vatrogasaca.

(2) Nadležno Odjeljenje za poslove zaštite od požara daje saglasnost na plan i program iz prethodnog stava i vrši nadzor nad njihovim izvršavanjem.

(3) Industrijske vatrogasne jedinice organizuju provjeru znanja za industrijske vatrogasce za svaku kalendarsku godinu.

(4) Zaposleniku koji prilikom provjeravanja stručnog znanja za obavljanje poslova industrijskog vatrogasca ne pokaže zadovoljavajući uspjeh prestaje svojstvo člana industrijske vatrogasne jedinice.

Član 58.

(Evidencije i izvještavanje)

(1) Industrijska vatrogasna jedinica dužna je da Vladi Brčko distrikta BiH, na njen zahtjev, dostavlja stalne i povremene izvještaje i daje pojedine podatke kojim raspolaže u vezi s poslovima zaštite od požara.

(2) Industrijske vatrogasne jedinice dužne su odmah nakon izvršene dojava o nastalom požaru obavijestiti Policiju Brčko distrikta BiH.

(3) Industrijske vatrogasne jedinice dužne su da vode propisanu evidenciju o požarima i elementarnim nepogodama i o svome učestvovanju u gašenju požara i spašavanju ljudi i materijalnih dobara.

Član 59.

(Zaštitna oprema)

Industrijski vatrogasci su dužni da, u toku intervencije gašenja požara i spašavanja ljudi i materijalnih dobara, nose propisanu zaštitnu opremu.

Član 60.

(Sastav)

(1) Industrijska vatrogasna jedinica je dužna imati najmanje četiri zaposlenika u jednoj smjeni od kojih najmanje tri s položenim stručnim ispitom za profesionalnog vatrogasca i najmanje jedan s položenim stručnim ispitom za rukovodioca akcije gašenja požara.

(2) Kod utvrđivanja broja vatrogasaca u industrijskim vatrogasnim jedinicama mora se voditi računa o sposobnosti i spremnosti vatrogasne jedinice iz prethodnog stava, tako da svaka smjena koja je na dužnosti bude po svom brojnom sastavu, stručnoj osposobljenosti i tehničkoj opremljenosti sposobna za efikasno gašenje požara .

(3) U vrijeme obavljanja svojih poslova i zadataka vatrogasac ne smije biti pod uticajem alkohola, opojnih droga ili psihotropnih supstanci.

(4) Tehnička oprema i sredstva za gašenje požara moraju biti ispravna i u pripravnosti i održavati se prema uputstvu proizvođača o čemu se vodi propisana dokumentacija.

Član 61.

(Uslovi)

(1) Vatrogasac u industrijskoj vatrogasnoj jedinici može biti zaposlenik koji, pored uslova za obavljanje poslova svog redovnog radnog mjesta, ispunjava i slijedeće uslove:

- a) da ima najmanje spremu III stepena obrazovanja;
- b) da nije stariji od 45 godina;
- c) da je zdravstveno i psihofizički sposoban za obavljanje poslova industrijskog vatrogasca.

(2) Zdravstvene i psihofizičke uslove iz tačke 3 prethodnog stava propisuje nadležni organ za poslove zdravstva u Brčko distriktu BiH.

(3) Industrijski vatrogasac može učestvovati u gašenju požara ako je položio propisani stručni ispit za profesionalnog vatrogasca.

(4) Općim aktom preduzeća ili drugog pravnog lica koje je osnovalo industrijsku vatrogasnu jedinicu mogu se propisati i drugi posebni uslovi za obavljanje poslova i zadataka industrijskog vatrogasca, te način nagrađivanja zaposlenika koji je član vatrogasne jedinice.

Član 62.

(Obaveza polaganja stručnog ispita)

Stručni ispit za rukovodioca akcije gašenja požara dužni su položiti starješine industrijskih vatrogasnih jedinica i vođe smjena, po programu ispita za rukovaoca akcije gašenja požara u profesionalnom vatrogastvu.

Član 63.

(Ispitna komisija)

- (1) Stručni ispit za industrijskog vatrogasca i za rukovodioca akcije gašenja požara polaže se pred ispitnom komisijom koju imenuje gradonačelnik.
- (2) Troškove polaganja stručnog ispita snosi preduzeće ili drugo pravno lice koje je uputilo kandidata na polaganje.
- (3) Visinu troškova za polaganje stručnog ispita i visinu naknade članova ispitne komisije određuje Vlada Brčko distrikta BiH na prijedlog nadležnog odjeljenja za poslove zaštite od požara.
- (4) Način pripremanja, uslovi polaganja stručnog ispita, nastavni plan i program stručnog osposobljavanja za polaganje ispita za industrijskog vatrogasca i rukovodioca akcije gašenja požara u industrijskom vatrogastvu definisat će se pravilnikom o stručnom osposobljavanju i polaganju stručnog ispita za profesionalnog vatrogasca i rukovodioca akcije gašenja požara u profesionalnom i industrijskom vatrogastvu, a koji donosi Vlada Brčko distrikta BiH.

GLAVA V – VATROGASNA DRUŠTVA

Član 64.

(Pojam)

- (1) Radi organizovanog dobrovoljnog učestvovanja građana u gašenju požara i spašavanja ljudi i materijalnih dobara ugroženih požarom i elementarnim nepogodama, kao i radi preventivne djelatnosti, propagiranja zaštite od požara kao i vršenja drugih zadataka u vezi sa zaštitom od požara, u skladu sa zakonom i planom zaštite od požara, radni ljudi, građani, preduzeća i druga pravna lica mogu osnivati vatrogasna društva koja djeluju kao udruženja.
- (2) Vatrogasno društvo mora imati osnivački akt i statut .
- (3) Za dva ili više preduzeća i drugih pravnih lica može se osnovati zajedničko vatrogasno društvo.

Član 65.

(Sastav)

- (1) Vatrogasno društvo u svom sastavu mora imati dobrovoljnu vatrogasnu jedinicu obučenu za gašenje požara.
- (2) Rok u kome će se formirati dobrovoljna vatrogasna jedinica, kao i broj vatrogasaca utvrđuje se statutom društva.
- (3) Lice koje nije navršilo 18 godina života ne može biti u sastavu dobrovoljne vatrogasne jedinice koja vrši gašenje požara.
- (4) U dobrovoljne vatrogasne jedinice mogu se primiti na rad i profesionalni vatrogasci.
- (5) Vatrogasno društvo može formirati sekcije za omladinu i druge sekcije.

Član 66.

(Rukovodioci i profesionalni vatrogasci)

(1) U dobrovoljnim vatrogasnim jedinicama gdje se poslovi obavljaju profesionalno starješina jedinice, rukovodioci akcije gašenja požara u smjenama kao i profesionalni vatrogasci moraju ispunjavati uslove za zasnivanje radnog odnosa propisane članovima 46 i 47 ovog zakona.

(2) Profesionalni vatrogasci u dobrovoljnim vatrogasnim jedinicama imaju ista prava, obaveze i odgovornosti koje su zakonom utvrđene za profesionalne vatrogasce u teritorijalnim vatrogasnim jedinicama.

Član 67.

(Naknade)

(1) Vatrogasci u dobrovoljnim vatrogasnim jedinicama, po pravilu vrše poslove besplatno.

(2) Licima koja u dobrovoljnoj vatrogasnoj jedinici poslove i zadatke ne obavljaju profesionalno gradonačelnik (za jedinice osnovane po teritorijalnom principu) i preduzeća koja su osnovale dobrovoljne vatrogasne jedinice mogu odrediti stalnu nagradu ili davati povremene nagrade za obavljeni rad.

Član 68.

(Obezbjedenje materijalnih sredstava za rad)

(1) Obezbjedenjem materijalnih sredstava za rad Skupština Brčko distrikta BiH, preduzeća i druga pravna lica i samostalne radnje pomažu vatrogasna društva u sprovođenju aktivnosti za koje su osnovana.

(2) Ako se planom zaštite od požara predviđaju obaveze vatrogasnog društva, odnosno dobrovoljne vatrogasne jedinice u gašenju požara i spašavanju ljudi i materijalnih dobara ugroženih požarom i elementarnim nepogodama Skupština Brčko distrikta BiH, preduzeća i druga pravna lica dužna su u tom slučaju da dobrovoljnoj vatrogasnoj jedinici obezbijede sredstva za vršenje zadataka koji proizilaze iz plana zaštite od požara.

(3) U dobrovoljnim vatrogasnim jedinicama iz prethodnog stava mora se obezbijediti da u svakoj smjeni bude raspoređen najmanje jedan radnik s položenim stručnim ispitom za rukovodioca akcije gašenja požarom.

Član 69.

(Prava članova)

(1) Članovi dobrovoljnih vatrogasnih jedinica imaju pravo na nadoknadu ličnog dohotka za vrijeme odsustvovanja sa rada, kada u sastavu vatrogasne jedinice učestvuju u akciji gašenja požara, spašavanja ljudi i materijalnih dobara ugroženih požarom akcidentnom situacijom ili elementarnim nepogodama.

(2) Ovu naknadu na teret Vlade Brčko distrikta BiH isplaćuje radnicima preduzeće i drugo pravno lice i samostalni privrednik kod koga je zaposlen.

(3) Ako se na traženje ovlaštenog lica gašenje požara odnosno spašavanje ljudi i materijalnih dobara vrši na području van teritorije Brčko distrikta BiH, naknada iz prethodnog stava vrši se

na teret Vlade Brčko distrikta BiH, s tim što gradonačelnik može tražiti refundaciju isplaćenih sredstava od općine na čijoj je teritoriji vršeno gašenje i spašavanje.

(4) Naknada iz prethodnog stava isplaćuje se u visini plaće koju bi radnik ostvario da je obavljao svoje redovne poslove i zadatke.

(5) Članovi dobrovoljne vatrogasne jedinice koji nisu u radnom odnosu kada učestvuju u gašenju požara ili spašavanju ljudi ili materijalnih dobara mogu od Vlade Brčko distrikta BiH tražiti naknadu u roku od 30 dana od dana izvršene akcije gašenja požara odnosno spašavanja ljudi ili materijalnih dobara.

(6) Visinu naknade utvrđuje Vlada Brčko distrikta BiH svojom odlukom.

Član 70.

(Udruživanje)

(1) Radi ostvarivanja zajedničkih ciljeva vatrogasna društva i profesionalne i industrijske vatrogasne jedinice na području Brčko distrikta BiH mogu se udruživati u vatrogasni savez.

(2) Vatrogasni savez Brčko distrikta BiH može se udružiti u Vatrogasni savez BiH.

(3) Vatrogasni savez Brčko distrikta BiH, pored poslova i zadataka utvrđenih statutom, vrši slijedeće poslove: koordinira i prati rad vatrogasnih društava na području Brčko distrikta BiH, stara se o stručnom osposobljavanju vatrogasaca dobrovoljnih vatrogasnih jedinica, utvrđuje plan i program stručnog osposobljavanja vatrogasaca i rukovodilaca dobrovoljnih vatrogasnih jedinica, donosi pravilnike kojima se regulišu pitanja osposobljavanja i polaganja ispita za zvanja vatrogasaca i rukovodioca akcije gašenja požara u dobrovoljnom vatrogastvu, kao i pravilnika o stručnom osposobljavanju i postizanju činova u dobrovoljnom vatrogastvu, pravilnika o zaštitnoj opremi i odjeći, radnoj odjeći, svečanim uniformama i vatrogasnim oznakama u dobrovoljnom vatrogastvu, donosi druga pravila kojima su regulisana pojedina pitanja od zajedničkog interesa za rad i funkcionisanje dobrovoljnih vatrogasnih jedinica i društava, propagira vatrogastvo i preduzima mjere za njegovo razvijanje i unapređivanje.

GLAVA VI – GAŠENJE POŽARA

Član 71.

(Obaveze građana)

(1) Svaki građanin koji primijeti požar dužan je da ga ugasi ako to može učiniti bez opasnosti po svoj život ili život drugoga.

(2) Ukoliko građanin nije u mogućnosti da ugasi požar, dužan je da o požaru obavijesti vatrogasnu jedinicu, policiju ili Službu osmatranja i obavještanja.

(3) Preduzeća i druga pravna lica, organi i organizacije ili samostalne radnje kad saznaju za požar, dužne su da pristupe njegovom gašenju, da u što kraćem roku obavijeste najbližu vatrogasnu jedinicu, policiju ili Službu osmatranja i obavještanja, te da po dolasku vatrogasne jedinice stave na raspolaganje zaposlene, opremu alat i druga sredstva rukovodiocu akcije gašenja požara na njegov zahtjev.

Član 72.

(Obaveza vatrogasne jedinice)

(1) Vatrogasna jedinica, čim sazna da je izbio požar na njenom području dužna je da u što kraćem roku pristupi njegovom gašenju i spašavanju ljudi i materijalnih dobara ugroženih požarom, bez obzira o čijim se materijalnim dobrima radi.

(2) Na isti način vatrogasna jedinica će učestvovati i u otklanjanju posljedica u elementarnim nepogodama, akcidentnim situacijama, saobraćajnim nesrećama i drugim nesrećama u granicama opremljenosti i osposobljenosti.

Član 73.

(Saradnja vatrogasnih jedinica)

(1) Ako vatrogasna jedinica ne može da ugasi požar, rukovodilac akcije gašenja požara zatražit će pomoć od drugih vatrogasnih jedinica s područja Brčko distrikta BiH.

(2) Vatrogasne jedinice od kojih je zatražena pomoć dužne su traženu pomoć pružiti u skladu sa Planom zaštite od požara Brčko distrikta BiH.

(3) U gašenju požara širih razmjera i spašavanju ljudi i imovine može se angažovati i jedinica (ekipa) za gašenje požara koju je formirala Služba za civilnu zaštitu Brčko distrikta BiH.

(4) Ako se gašenje požara ili spašavanje ljudi i materijalnih dobara ne može postići na način predviđen u stavu 1 ovog člana rukovodilac akcije gašenja požara može zatražiti od nadležnih rukovodilaca i starješina vatrogasnih jedinica da oni traže pomoć najbližih vatrogasnih jedinica van teritorije Brčko distrikta BiH.

(5) U slučaju da je pomoć tražila Profesionalna teritorijalna vatrogasna jedinica Brčko nadležni rukovodilac ili starješina jedinice dužni su što prije obavijestiti (usmeno i pismeno) gradonačelnika o traženoj pomoći.

Član 74.

(Rukovođenje gašenjem požara)

(1) Gašenjem požara i spašavanje ljudi i materijalnih dobara rukovodi rukovodilac akcije gašenja požara koji je započeo akciju gašenja i spašavanja, do dolaska njemu pretpostavljenog starješine koji može preuzeti rukovođenje akcijom gašenja i spašavanja

(2) Starješine vatrogasnih jedinica koje učestvuju u gašenju požara i spašavanju ljudi i materijalnih dobara mogu se dogovoriti ko će preuzeti rukovođenje akcije gašenja požara.

(3) Inspektor zaštite od požara Brčko distrikta BiH može narediti da rukovođenje akcijom preuzme drugi starješina ako ocijeni da je on stručniji i sposobniji za neposredno rukovođenje akcijom gašenja i spašavanja.

(4) U slučaju gašenja požara širih razmjera, većih šumskih požara, u slučajevima kada je radi bezbjednosti i uspješnog gašenja potrebno posebno stručno poznavanje tehnoloških postupaka i opasnosti u vezi s tim postupcima za rukovođenje akcijom gašenja požara, može se formirati štab u čiji sastav bi ušli pored starješina vatrogasnih jedinica i određena stručna lica i inspektor zaštite od požara.

Član 75.

(Ovlaštenja rukovodilaca akcije gašenja požara i inspektora zaštite od požara)

Radi efikasnijeg i nesmetanog gašenja požara i spašavanja ljudi i materijalnih dobara rukovodilac akcije gašenja požara kao i inspektor zaštite od požara Brčko distrikta BiH, može:

- a) zabraniti pristup nepozvanim licima u blizini mjesta požara, kao i saobraćaj pored mjesta požara;
- b) narediti evakuaciju lica i uklanjanje stvari iz susjednih objekata koji su ugroženi požarom, kao i preduzeti mjere za obezbjeđivanje stvari koje su evakuisane;
- c) narediti prekid dovođenja električne energije, plina ili drugog energenta;
- d) narediti djelimično ili potpuno rušenje objekta preko koga bi se požar mogao proširiti, ako se širenje požara ne može na drugi način spriječiti;
- e) ograničiti djelimično ili potpuno prekinuti dovod vode drugim potrošačima u zoni u kojoj se pojavio požar ili čitavom naselju radi obezbjeđivanja potrebne količine vode za gašenje požara;
- f) narediti korištenje vode iz obližnjeg bunara, cisterni, bazena, rezervoara, kanala i slično a koji pripadaju preduzećima i drugim pravnim licima, organima i organizacijama, samostalnim radnjama i privrednicima i privatnicima;
- g) narediti korištenje vozila preduzeća i drugih pravnih lica, preduzetnika kao i pojedinaca radi prevoženja nastradalih u požaru do najbliže zdravstvene ustanove;
- h) narediti upotrebu opreme i sredstava koja su u vlasništvu preduzeća, drugih pravnih lica, preduzetnika, a koja bi prema procjeni bila potrebna u akciji gašenja i spašavanja;
- i) nasilno otvoriti zaključani objekat ili prostoriju radi gašenja požara i spašavanja ljudi i materijalnih dobara, a po završetku intervencije obezbijediti objekat do dolaska policije ili vlasnika objekta;
- j) narediti licima koja stanuju u neposrednoj blizini mjesta požara, kao i licima koja se zateknu u neposrednoj blizini mjesta požara, da pruže pomoć u gašenju požara i spašavanju ljudi i materijalnih dobara;
- k) narediti upotrebu javne sirene radi bržeg okupljanja vatrogasaca.

Član 76.

(Obaveze građana i pravnih lica)

(1) U slučaju izbijanja požara širih razmjera ili kada prijete opasnost od naglog širenja požara ili postoji opasnost da požar ugrozi živote ljudi ili materijalna dobra u većem obimu, a raspoložive vatrogasne jedinice ne mogu lokalizovati i likvidirati požar, gradonačelnik Brčko distrikta BiH može narediti svim sposobnim građanima na području Brčko distrikta BiH starijim od 18 godina da učestvuju u gašenju požara i spašavanju ljudi i materijalnih dobara

ugroženih požarom i da za potrebe gašenja i spašavanja stave na raspolaganje alat, prijevozna, tehnička i druga sredstva.

(2) Gašenjem požara i spašavanjem ljudi i materijalnih dobara u slučaju iz prethodnog stava rukovodi gradonačelnik, koji na osnovu lične procjene može formirati i štab koji će rukovoditi akcijom gašenja i spašavanja.

(3) Gradonačelnik pod uslovima iz stava 1 ovog člana može narediti preduzećima i drugim pravnim licima preduzetnicima, da za potrebe gašenja stave na raspolaganje potreban broj ljudi, alat, prijevozna, tehnička i druga sredstva potrebna za gašenje požara i spašavanje ljudi i materijalnih dobara.

(4) Sva lica koja učestvuju u gašenju požara u slučaju povreda i nezgoda imaju pravo na zdravstveno osiguranje isto kao i članovi profesionalne i industrijske vatrogasne jedinice ako to pravo ne mogu ostvariti po drugom osnovu.

Član 77.

(Zdravstveno osiguranje)

Članovi vatrogasnih društava i pripadnici dobrovoljnih vatrogasnih jedinica, za vrijeme stručnog osposobljavanja i usavršavanja kao i za vrijeme učestvovanja u gašenju požara i spašavanju ljudi i materijalnih dobara ugroženih požarom i elementarnim nepogodama i u drugom angažovanju u okviru društva i jedinice u slučaju povreda i nezgoda imaju pravo na zdravstveno osiguranje kao i članovi profesionalnih i industrijskih vatrogasnih jedinica ako to pravo ne mogu ostvariti po drugom osnovu.

Član 78.

(Naknada troškova)

(1) Vatrogasne jedinice van teritorije Brčko distrikta BiH, koje po zahtjevu za pružanje pomoći a na osnovu dobijenih odobrenja učestvuju u gašenju požara i spašavanju ljudi i materijalnih dobara ugroženih požarom i elementarnim nepogodama na području Brčko distrikta BiH, imaju pravo na naknadu stvorene štete prouzrokovane na tehničkoj opremi kao i naknadu neophodnih troškova koje su imale pri učestvovanju u gašenju požara (oštećena oprema, sredstva utrošena u gašenju požara, gorivo, dnevnice i drugo).

(2) Naknadu iz prethodnog stava snosi Vlada Brčko distrikta BiH.

(3) Vlada Brčko distrikta BiH poslije isplaćene naknade može tražiti regresiranje od preduzeća, pravnih lica, zanatskih radnji i privrednika čija su materijalna dobra spašavana.

Član 79.

(Naknada stvarne štete)

(1) Naknadu u visini stvarne štete preduzećima i drugim pravnim licima, zanatskim radnjama, privrednicima i građanima, u slučajevima iz člana 75 tački d, f i g ovog zakona plaća Vlada Brčko distrikta BiH.

(2) Visinu štete utvrđuje posebna komisija koju imenuje Vlada Brčko distrikta BiH.

GLAVA VII – NADZOR NAD SPROVOĐENJEM MJERA ZAŠTITE OD POŽARA

Član 80.

(Ko vrši nadzor)

- (1) Nadzor nad sprovođenjem mjera zaštite od požara određenih ovim zakonom i planom zaštite od požara, kao i nad sprovođenjem propisa o tehničkim normativima u pogledu zaštite od požara, vrši odjeljenje nadležno za poslove zaštite od požara.
- (2) Inspekcijske poslove iz stava 1 ovog člana iz oblasti zaštite od požara vrše inspektori zaštite od požara.

Član 81.

(Ovlaštenja vatrogasne jedinice)

- (1) Gradonačelnik Brčko distrikta BiH može ovlastiti profesionalnu vatrogasnu jedinicu Brčko da vrši pojedine stručne poslove nadzora koji se odnose na blagovremenost i smanjenje efikasnosti vatrogasne intervencije, funkcionalnost i efikasnost vodozahvata, hidranata, vatrogasnih aparata za početno gašenje požara, odlaganja zapaljivih tečnosti i gasova i drugih zapaljivih materijala u podrumima, tavanima i drugim mjestima gdje predstavljaju opasnost, prohodnost požarnih puteva i prilaza električnim razvodnim tablama, hidrantima, aparatima, blokadnim ventilima gasnih instalacija i instalacija sa zapaljivim tečnostima, zabrani korištenja otvorenog plamena i pušenja na požarno ugroženim prostorima i obuke zaposlenih radnika iz oblasti zaštite od požara.
- (2) Poslove iz prethodnog stava mogu vršiti samo pripadnici vatrogasne jedinice koji imaju školsku spremu najmanje IV stepena i položen ispit za rukovodioca akcije gašenja požara.
- (3) O izvršenoj kontroli sačinjava se zapisnik s prijedlogom mjera za otklanjanje uzroka koji mogu dovesti do nastajanja i širenja požara, koji se dostavlja vlasniku odnosno korisniku objekta.
- (4) Ako vlasnik, odnosno korisnik objekta ne izvrši predložene mjere iz dostavljenog zapisnika, profesionalna vatrogasna jedinica iz stava 1 ovog člana o tome odmah obavještava inspektora zaštite od požara.
- (5) Nadzor nad vršenjem poslova iz stava 1 ovog člana vrši inspektor zaštite od požara.

Član 82.

(Nadležnosti inspektora zaštite od požara)

- (1) Radi sprečavanja nastanka i širenja požara inspektor zaštite od požara može odrediti da se preduzmu slijedeće mjere:
- a) preurede, premjeste, odnosno demontiraju dimnjaci, peći, instalacije i dr. uređaji od kojih prijeti opasnost da izazovu požar;

- b) izvrši popravka, rekonstrukcija, dogradnja i pregradnja na objektima, instalacijama i uređajima radi sprečavanja nastanka i širenja požara;
- c) zabrani upotreba objekta ili postrojenja ako se njihovim preuređenjem ili drugim mjerama ne može otkloniti opasnost od nastanka požara za takve ili susjedne objekte;
- d) izvrši uklanjanje građevinskih i drugih prepreka, instalacija i uređaja koji bi u slučaju nastanka požara predstavljali smetnju za brzo i efikasno spašavanje ljudi i materijalnih dobara i gašenje požara;
- e) zabrani pušenje, upotreba otvorene vatre, svjetiljki sa otvorenim plamenom i alata koji varniči na određenom mjestu;
- f) odredi preduzimanje zaštitnih mjera protiv ubacivanja predmeta izvana koji bi mogli prouzrokovati nastanak požara;
- g) uvede stalni nadzor na mjestima gdje su smještene zapaljive materije;
- h) izvrši nabavka neophodne potrebne vatrogasne opreme i sredstava za gašenje požara kao i njihovo čuvanje i održavanje u ispravnom stanju;
- i) vrši redovno otklanjanje otpadnih materijala i drugih predmeta za mjesta na kojima predstavljaju opasnost za nastanak požara;
- j) izvrši obilježavanje požarnih puteva i redovno vrši njihovo održavanje;
- k) zabrani dalje izvođenje radova dok izvođač radova ne preduzme potrebne mjere za sprečavanje nastanka i širenja požara i ne obezbijedi potrebna sredstva i opremu za gašenje požara;
- l) u vatrogasnim jedinicama da se izvrši nabavka nedostajuće tehničke i zaštitne opreme i sredstava, opravka postojeće opreme i sredstava, kao i preduzmu mjere radi poboljšanja stručnog osposobljavanja i usavršavanja vatrogasaca i cjelokupnog poboljšanja mobilnosti i efikasnosti vatrogasne jedinice;
- m) zabrani dalja gradnja objekta ili naloži da se otklone nedostaci u projektnoj dokumentaciji iz člana 16 ovog zakona;
- n) odrediti preduzimanje i drugih mjera propisanih zakonima i tehničkim propisima, radi sprečavanja nastanka i širenja požara.

(2) Prije određivanja radnji iz stava 1 od tačke a do f inspektor može odrediti stručni komisijski pregled objekta i postrojenja.

Član 83.

(Rješenje o zabrani korištenja objekata)

(1) Ako se utvrdi da se pri korištenju objekta ili dijela objekta, instalacija ili uređaja ne sprovode propisane ili naložene mjere zaštite od požara, pa zbog toga prijeti neposredna opasnost od nastanka požara, inspektor zaštite od požara može zabraniti dalje korištenje objekta ili dijela objekta, instalacije ili uređaja dok se propis odnosno naložene mjere ne sprovedu.

(2) U rješenju o zabrani iz prethodnog stava, može se odrediti da žalba ne odlaže izvršenje rješenja.

Član 84.

(Rješenje o zabrani korištenja opreme i uređaja)

Ako inspektor utvrdi da su stavljeni u promet uređaji, sredstva i oprema iz člana 28 ovog zakona uz koje uvoznik ili zastupnik strane firme nije korisniku isporučio potrebnu dokumentaciju, može zabraniti njihovu daljnju upotrebu.

Član 85.

(Obaveza otklanjanja nedostataka)

(1) Preduzeća i druga pravna lica, preduzetnici obavezni su u određenim rokovima otkloniti nedostatke naložene pravosnažnim rješenjem inspektora zaštite od požara.

(2) Preduzeća i druga pravna lica, preduzetnici iz prethodnog stava obavezni su pismeno obavijestiti inspektora zaštite od požara o izvršenju njegovog rješenja u roku od 8 (osam) dana od dana isteka određenog roka u rješenju predviđenog za otklanjanje nedostataka odnosno nepravilnosti.

GLAVA VIII – FINANSIRANJE ZAŠTITE OD POŽARA

Član 86.

(Pojam)

Preduzeća i druga pravna lica, preduzetnici i pojedinci finansiraju zaštitu od požara kao sastavni dio redovne djelatnosti i životne aktivnosti.

Član 87.

(Budžetsko finansiranje zaštite od požara)

(1) Sredstva za rad profesionalnih vatrogasnih jedinica Brčko osnovanih po odluci Skupštine Brčko distrikta BiH obezbjeđuje se iz Budžeta Brčko distrikta BiH, kao i iz namjenskih sredstava za ove jedinice u ostvarivanju zadataka civilne zaštite i prihoda koje jedinice ostvare vršenjem usluga koje ne spadaju u redovnu djelatnost jedinice te drugih izvora u skladu sa zakonom.

(2) Sredstva za rad industrijskih vatrogasnih jedinica obezbjeđuje preduzeće ili drugo pravno lice koje je osnovalo ovu jedinicu, kao i iz namjenskih sredstava za ostvarivanje zadataka civilne zaštite, a koje je u skladu sa zakonom o civilnoj zaštiti ako ova jedinica obavlja i te zadatke.

Član 88.

(Ostalo finansiranje)

(1) Sredstva za rad teritorijalnih vatrogasnih društava i teritorijalnih dobrovoljnih vatrogasnih jedinica koje su formirane u vatrogasnim društvima obezbjeđuju se iz dopunskih sredstava Budžeta Brčko distrikta BiH, odnosno članarina i poklona, namjenskih sredstava koja se daju

na korištenje kao oprema i inventar za ostvarivanje zadataka ovih jedinica u funkcionisanju civilne zaštite u skladu sa zakonom o civilnoj zaštiti, i drugih izvora.

(2) Sredstva za rad dobrovoljnih vatrogasnih društava i zajedničkih dobrovoljnih industrijskih vatrogasnih jedinica osnovanih po preduzetnom principu obezbjeđuju se iz sredstava preduzeća koja su ih osnovala, a mogu se obezbjeđivati i dodatna sredstva uz shodnu primjenu stava 1 ovog člana.

Član 89.

(Posebne takse)

(1) Skupština Brčko distrikta BiH, na osnovu ukazane potrebe, a radi obezbjeđivanja sredstava za opremanje i razvoj vatrogasne jedinice i razvoja zaštite od požara u cjelini, može donijeti odluku o uvođenju posebne takse.

(2) Sredstva prikupljena na ovaj način isključivo se mogu upotrijebiti za potrebe vezano za stav 1 ovog člana.

Član 90.

(Usmjeravanje sredstava)

(1) Sredstva od naplaćenih novčanih kazni za prekršaje u oblasti zaštite od požara, usmjeravaju se i koriste za nabavku tehničke opreme i sredstava za gašenje požara, za izgradnju objekata za smještaj vatrogasnih jedinica i njihove opreme, za obrazovanje vatrogasnih kadrova, edukaciju i propagandu djelatnosti zaštite od požara, putem posebnog računa (podračuna) Vlade Brčko distrikta BiH.

Član 91.

(Finansiranje vatrogasnog saveza)

Sredstva za rad Vatrogasnog saveza Brčko distrikta BiH obezbjeđuju se iz dopunskih sredstava Budžeta Brčko distrikta BiH, članarina vatrogasnih društava i jedinica i drugih izvora.

GLAVA IX – KAZNENE ODREDBE

Član 92.

Novčanom kaznom u iznosu od 3.000,00 do 15.000,00 KM, kaznit će se za prekršaj preduzeće ili drugo pravno lice iz člana 19 ovog zakona ili preduzeće i drugo pravno lice ili preduzetnik, registrovani za vršenje djelatnosti zaštite od požara ili preduzeće i drugo pravno lice, preduzetnik i ovlašteno stručno lice koji rade tehničku dokumentaciju za građenje objekta ako:

- a) suprotno propisima, standardima i drugim normativima zaštite od požara potvrde da su u potpunosti primijenjeni propisi, standardi i drugi normativi zaštite od požara kojima je obezbijeđena funkcionalnost i efikasnost tehničkom dokumentacijom primijenjenih, odnosno odabranih mjera i normativa zaštite od požara (član 17 stav 3 i član 19 stav 1);

- b)** ne postupe u skladu s propisima i standardima pri ispitivanju iz člana 20 stava 2 i člana 29 stava 2 i člana 30 ovog zakona;
- c)** i dalje koriste objekte ili dio objekta, instalacije ili uređaje, i pored rješenja o zabrani korištenja, koje je donio inspektor za zaštitu od požara, član 84 ovog zakona.

(2) Za prekršaje iz prethodnog stava kaznit će se i odgovorno lice u preduzeću ili drugom pravnom licu iz člana 19 ovog zakona ili preduzeće i drugo pravno lice ili preduzetnik registrovani za vršenje djelatnosti zaštite od požara, novčanom kaznom u iznosu od 500,00 do 5.000,00 KM.

Član 93.

(1) Novčanom kaznom u iznosu od 5.000,00 do 10.000,00 KM kaznit će se za prekršaj preduzeće i drugo pravno lice ili preduzetnik:

- a)** ako ne utvrde propisanu organizaciju u skladu s članom 9;
- b)** ako pri izvođenju radova na objektima ne preduzme potrebne mjere za sprečavanje nastajanja i širenja požara i ne obezbijedi potrebna sredstva i opremu za gašenje požara (član 13 stav 2);
- c)** ukoliko ne odredi požarni sektor ili ne sprovede sve tehničke mjere na osnovu kojih su ovi sektori određeni (član 14);
- d)** ako upotrebljava neispravne ili nepravilno postavljene instalacije, uređaje, kao i dimovode i ložišta ili nema dokumentaciju o održavanju (član 21);
- e)** ako drži ili uskladištava lahko zapaljive materije suprotno odredbi člana 23 stava 1 ili koristi otvorenu vatru suprotno odredbama člana 23 stava 2 ovog zakona;
- f)** ako ne drži u pripravnosti uređaje, opremu i sredstva za gašenje na pristupačnom mjestu shodno članu 26 ovog zakona;
- g)** ako ne obezbijedi posebne mjere shodno članu 26 ovog zakona;
- h)** ako ne obezbijedi vatrogasno dežurstvo shodno članu 27 ovog zakona;
- i)** ako ne uplaćuje obaveze iz člana 91 ovog zakona;
- j)** ako ne obezbijedi redovnu kontrolu i ispitivanje ručnih i prijevoznih vatrogasnih aparata za gašenje početnih požara i hidrantske mreže (član 29);
- k)** ako ne obezbijedi redovno ispitivanje ispravnosti i funkcionalnosti uređaja i sistema u skladu s članom 30 ovog zakona;
- l)** ako stavi u promet uređaje, opremu i sredstva suprotno odredbama člana 28 ovog zakona ili ako ne izvrši naređenje o zabrani upotrebe opreme iz člana 85 ovog zakona;
- m)** ako se ponaša suprotno odredbi člana 31 ovog zakona;
- n)** ako ne izvrše obučavanje i upoznavanje radnika sa opasnostima od požara i praktičnom upotrebom opreme i sredstava za gašenje požara član 33 ovog zakona;

- o) ako ne donese plan i program stručnog osposobljavanja i usavršavanja vatrogasaca, ne organizuje njegovo sprovođenje ili ne izvrši provjeru stručnog znanja vatrogasaca članovi 42 i 58 ovog zakona;
- p) ako vrši radnje suprotno članovima 45 i 61 ovog zakona;
- q) ako po saznanju za požar ne postupi u skladu s članom 72 stavom 3 ovog zakona;
- r) ako sprječava ili ometa izvršenja rukovodioca akcije gašenja požara ili inspektora za zaštitu od požara članovi 75 i 76 ovog zakona;
- s) ako u određenom roku ne izvrši naložene mjere zaštite od požara a nastavi sa korištenjem odnosno s gradnjom objekta, ne izvijesti pismeno inspektora za zaštitu od požara o izvršenju njegovog rješenja u predviđenom roku (članovi 83, 84, 85 i 86 ovog zakona).

(2) Za prekršaj iz prethodnog stava kaznit će se novčanom kaznom od 150,00 do 1.500,00 KM i odgovorno lice u preduzeću, drugom pravnom licu ili preduzetnik.

Član 94.

Novčanom kaznom od 100,00 do 1.000,00 KM, kaznit će se za prekršaj pojedinac:

- a) ako upotrebljava neispravne ili nepravilno postavljene instalacije, dimovode ili ložišta (član 21 stav 2);
- b) ako drži ili uskladištava lahko zapaljive materije suprotno odredbi člana 23 stava 1 ili koristi otvorenu vatru suprotno odredbi člana 23 stava 2 ovog zakona;
- c) vlasnik radnje ako ne preduzme mjere propisane ili naložene shodno članu 25;
- d) ako ne obezbijedi redovnu kontrolu i ispitivanje vatrogasnih aparata za gašenje početnih požara u skladu s članom 29 ovog zakona;
- e) ako postupi suprotno odredbi člana 72 stavova 1 i 2 ovog zakona;
- f) ako sprječava ili ometa izvršenje rukovodioca akcije gašenja požara ili inspektora za zaštitu od požara članovi 75 i 76 ovog zakona;
- g) ako bez opravdanog razloga odbije da učestvuje u gašenju požara i spašavanju ljudi i materijalnih dobara ugroženih požarom ili ako odbije da stavi na raspolaganje vatrogasnoj jedinici alat, tehnička sredstva, prijevozna i druga sredstva potrebna za gašenje požara i spašavanje ljudi i materijalnih dobara, član 77 stav 1 ovog zakona;
- h) ako postupi suprotno odredbama člana 22 ovog zakona;
- i) ako u određenom roku ne izvrši naložene mjere zaštite od požara, a nastavi s korištenjem odnosno građenjem objekta, ne izvijesti pismeno inspektora za zaštitu od požara o izvršenju njegovog rješenja u predviđenom roku (članovi 83, 84, 85 i 86 ovog zakona).

ZAVRŠNI DIO - PRIJELAZNE I ZAVRŠNE ODREDBE

Član 95.

(Ovlaštenja Vlade)

Vlada Brčko distrikta BiH po pribavljenom mišljenju inspektora za zaštitu od požara Brčko distrikta BiH, donosi propise o mjerama zaštite od požara šuma i usjeva.

Član 96.

(Obaveza Skupštine i Vlade)

(1) Skupština Brčko distrikta BiH donijet će plan zaštite od požara Brčko distrikta BiH u skladu s članom 6 i članom 7 ovog zakona u roku od 18 mjeseci od dana stupanja na snagu ovog zakona.

(2) Vlada Brčko distrikta BiH će u roku od 12 (dvanaest) mjeseci od dana stupanja na snagu ovog zakona utvrditi metodologiju za izradu plana zaštite od požara.

Član 97.

(Obaveza donošenja pravilnika i drugih podzakonskih propisa)

Gradonačelnik Brčko distrikta BiH će u roku od 12 mjeseci donijeti propise o programu i načinu pripremanja i polaganja stručnog ispita za profesionalnog i industrijskog vatrogasca i rukovodioca akcije gašenja požara u profesionalnom i industrijskom vatrogastvu, kao i propise o uniformama i funkcionalnim oznakama u profesionalnom vatrogastvu i pravila službe u vatrogasnim jedinicama.

Član 98.

(Radnici zatečeni na mjestu profesionalnog vatrogasca)

Radnici koji su se na dan stupanja na snagu ovog zakona zatekli na radnom mjestu profesionalnog vatrogasca, a koji ne ispunjavaju uslove iz člana 46 stava 1 tački a i b ovog zakona, mogu ostati na tom radnom mjestu ako polože stručni ispit za profesionalnog vatrogasca u roku od 1 (jedne) godine od dana stupanja na snagu ovog zakona i ako su obavljali poslove profesionalnog vatrogasca u vatrogasnoj jedinici neprekidno najmanje

12 (dvanaest) mjeseci do stupanja na snagu ovog zakona.

Član 99.

(Primjena dosadašnjih podzakonskih akata)

Do donošenja odgovarajućih propisa u Brčko distriktu BiH i BiH primjenjivat će se slijedeći propisi:

- a) Pravilnik o programu i načinu pripremanja i polaganja stručnog ispita za profesionalne vatrogasce i rukovodioce akcije gašenja požara («Sl. list SRBiH», br. 14/77);
- b) Pravilnik o stručnoj spremi i načinu provjere stručnog znanja lica koja mogu rukovati eksplozivnim materijama i lica koja mogu rukovati zapaljivim tečnostima i gasovima u prometu («Sl. list SRBiH», broj 15/78);

- c) Odluka o metodologiji za izradu plana zaštite od požara koji donosi Skupština općine («Sl. list SRBiH», broj 33/87);
- d) Pravila službe u vatrogasnim jedinicama (« Sl. list SRBiH«, broj 19/91);
- e) Pravilnik o posebnim uslovima za vršenje kontrolnog ispitivanja aparata za gašenje početnog požara («Sl. glasnik RS« , broj 9/96);
- f) Pravilnik o smještaju i držanju ulja za loženje (« Sl. list SFRJ« , broj 45/67);
- g) Pravilnik o tehničkim mjerama za pogon i održavanje elektroenergetskih postrojenja («Sl. list SFRJ», broj 19/68);
- h) Pravilnik o zaštiti na radu pri izradi eksploziva i baruta i manipulisanju eksplozivima i barutima («Sl. list SFRJ», broj 56/69);
- i) Pravilnik o izgradnji postrojenja za zapaljive tečnosti i o uskladištavanju i pretakanju zapaljivih tečnosti («Sl. list SFRJ», brojevi 20/71 i 23/71);
- j) Pravilnik o izgradnji postrojenja za tečni naftni gas i o uskladištavanju i pretakanju tečnog naftnog gasa (« Sl. list SFRJ«, brojevi 24/71 i 26/71);
- k) Pravilnik o izgradnji stanica o snabdijevanju gorivom motornih vozila i o uskladištavanju i pretakanju goriva («Sl. list SFRJ», broj 27/71);
- l) Pravilnik o tehničkim normativima za zaštitu od statičkog elektriciteta («Sl. list SFRJ», broj 62/73);
- m) Tehnički propisi o gromobranima («Sl. list SFRJ«, brojevi 13/68 i 13/78);
- n) Pravilnik o tehničkim normativima za zaštitu niskonaponskih mreža i pripadajućih transformatorskih stanica («Sl. list SFRJ, «broj 13/78);
- o) Pravilnik o tehničkim normativima za pokretne zatvorene sudove za komprimirane tečne i pod pritiskom zatvorene gasove («Sl. list SFRJ», broj 25/80);
- p) Pravilnik o tehničkim normativima za uređaje za automatsko zatvaranje vrata ili klapni otpornih prema požaru («Sl. list SFRJ», broj 35/80);
- q) Pravilnik o Jugoslovenskim standardima za protiveksplozijsku zaštitu («Sl. list SFRJ», broj 18/81);
- r) Pravilnik o tehničkim normativima za stanične posude pod pritiskom («Sl. list SFRJ», broj 16/83);
- s) Pravilnik o tehničkim normativima za sisteme za odvođenje dima i toplote nastalih u požaru («Sl. list SFRJ», broj 45/83);
- t) Pravilnik o tehničkim normativima za zaštitu visokih objekata od požara («Sl. list SFRJ», broj 7/84);
- u) Pravilnik o tehničkim normativima za uređaje u kojima se nanose i suše premazna sredstva («Sl. list SFRJ», broj 57/85);

- v) Pravilnik o tehničkim normativima za postavljanje kotlarnica na otvorenom prostoru («Sl. list SFRJ», broj 12/85);
- w) Pravilnik o tehničkim uslovima i normativima za siguran transport tečnih i gasovitih ugljovodonika magistralnim naftovodima i gasovodima i naftovodima i gasovodima za međunarodni transport («Sl. list SFRJ», broj 26/85);
- x) Pravilnik o tehničkim normativima za zaštitu skladišta od požara i eksplozija («Sl. list SFRJ», broj 24/87);
- y) Pravilnik o tehničkim normativima za električne instalacije niskog napona («Sl. list SFRJ», brojevi 53/88 i 54/88);
- z) Pravilnik o tehničkim normativima za izgradnju nadzemnih elektroenergetskih vodova nazivnog napona od 1 kV – 400 kV («Sl. list SFRJ», broj 65/88);
- aa) Pravilnik o tehničkim normativima za stabilne uređaje za gašenje požara ugljen-dioksidom («Sl. list SFRJ», brojevi 44/83 i 31/89);
- bb) Pravilnik o tehničkim normativima za sisteme za ventilaciju ili klimatizaciju («Sl. list SFRJ», broj 38/89);
- cc) Pravilnik o tehničkim normativima za postavljanje stabilnih sudova pod pritiskom za tečni ugljen-dioksid («Sl. list SFRJ», broj 39/90);
- dd) Pravilnik o tehničkim normativima za cijevne vodove za gasoviti kiseonik («Sl. list SFRJ», broj 52/90);
- ee) Pravilnik o tehničkim normativima za zaštitu elektroenergetskih postrojenja i uređaja od požara («Sl. list SFRJ», broj 74/90);
- ff) Pravilnik o tehničkim normativima za pregled i ispitivanje stabilnih sudova pod pritiskom za tečni ugljen-dioksid («Sl. list SFRJ», broj 76/90);
- gg) Pravilnik o tehničkim normativima za hidrantsku mrežu za gašenje požara («Sl. list SFRJ», broj 30/91);
- hh) Zakon o standardizaciji («Sl. list SFRJ», broj 80/91);
- ii) Grupe jugoslovenskih standarda sa obaveznom primjenom.

Član 100.

(Prestanak primjene dosadašnjih zakona)

Danom stupanja na snagu ovog zakona prestaje primjena Zakona o zaštiti od požara («Sl. list SRBiH», brojevi 15/87, 37/88, 38/89 i 36/90 i «Sl. glasnik RS» 16/95 i 16/02).

Član 101.

(Stupanje na snagu zakona)

Ovaj zakon stupa na snagu 8. (osmog) dana od objavljivanja u „Službenom glasniku Brčko distrikta BiH“.